

香書

十四



大明仁孝皇后勸善書卷之十四

嘉言

儒天道虧盈而益謙地道變盈而流謙鬼神害盈而福謙人道惡盈而好謙○汝惟不矜天下莫與汝爭能汝惟不伐天下莫與汝爭功○必有忍其乃有濟○上帝臨汝無貳爾心○欲速則不達見小利則大事不成○小不忍則亂大謀○所謂誠其意者毋自欺也○愛人不親反其仁治人不治反其智禮人不答反其敬○小勇者血氣之怒也大勇者理義之怒也血氣之怒不可有理義之怒不可無○不鬪辯則無暴亂之禍矣○能忍耻者安能忍辱者存○和惠謙恭享有多福○福生有基禍生有胎納其基絕其胎禍何自來○藏精於晦則明養神於靜則安○惟能忍窮故得免禍○謙虛冲損可以免害○愚勝智拙勝巧訥勝辯如此者全身昧此者蹈禍○古人重厚朴直乃能立功立事享悠久之福○忍之一字衆妙之門○忍則百惡消滅謹則萬禍不侵○終身讓路不枉百步終身讓畔不失一段○誠無悔恕無怨和無仇忍無競○行之於身人得而見之

盡之於心神得而知之人之聰明猶不可欺况神之聰明乎○無愧于口不若無愧于身無愧于身不若無愧于心○高不可欺者天也尊不可欺者君也內不可欺者親也外不可欺者人也四者既不可欺心其可欺乎○忠正無邪神明所祐○慈祥而寬厚謙遜而靜慈生焉而心體安沒焉而子孫大○謹則無憂忍則無辱靜則常安儉則常足○天聰窈無音蒼蒼何處尋非高亦非遠都只在人心

釋者以諍止諍至竟不能止唯忍能止諍是法最尊貴○能行忍者乃可名為有力大人○忍辱第一道○忍者無惡必為人尊○為人端正後忍辱中來○忍辱是安樂行○忍不可忍是乃聖教○心不可縱意不可逞若能抑忍則煩惱可除○忍之為德持戒善行所不能及○我見被人謾一似國中非日日被人傷天生還自有○嗔是心中火能燒功德林欲行菩提道忍辱護真心○見怒能忍是為梵行○讓則尊卑和睦忍則衆惡無喧○忍苦受辱令成法身○重以惡來者吾重以善往福德之氣常在此也害氣重殃反在于彼○每事思忍則悔吝消於現世福報顯於將來

○忍是心之寶不忍身之殃古柔常在口齒折只為剛○得忍且忍得戒且戒不忍不戒小事成大○忍一時之氣免十日之憂○一切諸煩惱皆從不忍生臨機與對境妙在先見明○心不負人面無慚色○至誠不欺得好名譽○雖處私室如臨至尊○常當自防護以義內省察○直心是道場無虛假故○遠離諂曲質直無偽○身心靜無諂無曲

道受辱不怨受寵若驚○知其榮守其辱為天下谷○以其不爭故天下莫能與之爭○柔弱保身可以長久○信已何求非已何憎德行由已非譽由人○忍者身之寶慎勿與人爭一切諸魔來吾以忍坐勝一切諸真人皆以忍辱故○夫惟不爭故無尤○善者君子之所本百行之所長萬福之所往來○人若遇我以禍但以福往自然福德之氣長生於我○柔弱護身之本劉強惹禍之由○不履邪運不欺暗室○視於冥冥聽於無聲冥冥之中獨有曉焉冥冥之中獨有照焉○附耳之語流聞千里○塊然保真抱德推誠○念真心不退忠信不妄言○貌不羨乎情言不溢乎行○忠信形於內感動應於外○君子內不負心外不愧影上不欺天下

不食言○行善不為名而名從之○出處語默天地皆知惟正可守心不可欺○潔身守正不欺方寸自然默符天理○操脩於明行悖於幽人不知則鬼神知之○直道而行無偏無黨是曰善人所當崇獎○若欲不知除非不為○是非終日有不聽自然無○人可欺天不可欺人可瞞天不可瞞

感應

宋淳熙十年南康建昌縣早民告於軍司戶張玘于溫受牒檢視甘泉鄉人李氏名曰數百畝皆成熟不肯陳詞閭社交徧責之謂其立異李曰投訴當以實我家田不早豈欺天欺人且自欺乎必不可衆人惡曰今一鄉稱早而君獨否官司必以他人為妄是獨善其身而貽害於百室也李猶持前說於是唱率惡少夜拋磚石擊其扉及屋瓦呼譟徹旦固未逞志遂公肆言恐之曰先焚爾廬次戕爾族事到有司不過推一人償命耳李不獲已亦隨衆自列得以分數蠲租為錢六萬既而悔之曰禾穀不損而強我如此何以俯仰於天地間顧已不可奈何乃邀道士數輩用所免之數

達醮筵以謝過示不以無名之財自潤也明年秋此鄉復旱無毫釐之收唯李田高下皆獲豐稔

宋章行式採訪西川其姪子威侍行有老兵丁約日侍左右子威覺其不凡方欲詰問約曰吾神仙也上帝嘉子不欺暗室遣吾下降更加審察今果不欺得道必矣但尚餘兩塵耳子威曰何謂兩塵約曰儒謂之世釋謂之劫道謂之塵塵即世劫也

唐張建章奉使渤海中流遇風波濤如山自分必死俄見一青衣乘一小舟而至曰仙官召君方恍惚間則已達岸仙官曰君平生不欺暗室上帝所知波濤無足慮但復登舟吾當遣人護子建章竟得將命而返於是棄官學道遂獲登真

宋楊希仲字季達蜀州新津人未第時為成都某氏館賓家有小婦少而美詣學舍調客試其所守希仲正色拒之遂去其妻在鄉里是夕夢人告曰汝夫獨處他鄉能自操持不欺暗室神明舉家知之當令魁多士以為報妻覺不知何事也歲暮夫歸始言其故明年全蜀類試希仲乃為第一

人

宋費樞字道樞廣都人宣和庚子歲入京師將至長安舍於臘脂坡下旅館解擔時日已暝山主家婦煢然倚戶顧客勤渠發勞苦之語繼而獨身來前曰竊慕上客高誼願申困苦之情可乎費愕然曰汝何為者何以得至此曰我父京師販繒主人也家在某里以我嫁此店子夫今亡貧無以歸不能忍饑寒願依於子費曰吾不欲犯非禮汝之情吾實知之當往訪汝父令遣人迎汝汝勿怨婦人羞愧感謝而去費至京他日過某里得所謂販繒者家通名欲相見主人曰客何人安得與我有故答曰吾蜀人費樞也比經長安邂逅翁女有所託者是以来翁躡履出迎曰疇昔之夜夢神告吾女將失身於人非遇費秀才殆失矣君姓字真是也願聞其說具以告翁流涕拱謝曰神言君且為貴人當不妄退而計其夢果所見女之時即日遣長子與女歸而更嫁之明年費登科官至大夫為巴東守宋林述中博士嘗言有一郡鼓角樓纔三更時即有鬼掩其鼓擊之不鳴兵級屢以失更見治甚苦及往見一禪師求禳之之術師曰汝候其未則

遽執之級曰執恐不獲師曰但禁氣勿言級如所諭夜果得鬼天欲將曉鬼乃哀告兵級吾於太守暨諸僚屬並無所畏其所畏者獨二人一某寺禪師一某處黃二叔汝可赦吾不復來矣某寺禪師即兵級所訪者素有道德人皆欽仰黃二叔者未知何等人明日聞於太守召而詰之乃一老圃鬻菜為業凡三十年菜之老嫩東之大小持心不二然老圃於物不欺有所寸長尚使鬼神欽畏如此而况世之君子有大過人者乎

昔阿難邠塚在兗連山下居大富珍寶四遠賈客舉貸乞凶者往無不得時有五百賈客行海船壞珍寶皆沒死者不少或依板得活咸詣阿難邠塚主人設食汲井得寶篋篋各有題疏其姓字估客食訖皆悲主人問故答言我等伴侶五百人共行海中船舶翻沒死者不少挾持小板方得生活亡失珍寶悲念伴侶耳屬覩井中所得寶篋皆是我許不知那爾主人言卿曹行治生賈販若至心者不失也但不至心故失耳我從無數劫以來未嘗不至心初不欺侵諸失寶者皆趣我井卿各案姓字取去

昔信州林茂先才高過人已捧鄉書家極貧閉戶讀書鄰家巨富婦厭其

夫不學私慕茂先才名夜奔之茂先呵之曰男女有別禮法不容天地鬼神羅列森布何可以此污我婦慙而退茂先次年登第三子皆登第
首孺提孺提華言也仙人在大林中脩忍行慈時迦利王將姝女入林遊戲
飲食既訖王小睡息諸姝女輩採花林間見此仙人加敬禮拜在一面立
仙人爾時為諸姝女讚說慈忍其言美妙聽者無厭久而不去迦利王覺
不見姝女拔劍追蹤見在仙人前立嬌妬隆盛瞋目奮劍而問仙人汝作
何物仙人答言我今在此修忍行慈王言我今試汝當以利劍截汝耳鼻
斬汝手足若不瞑者知汝脩忍仙人言任意王即拔劍截其耳鼻斬其手
足而問之言汝心動不答言我心脩行慈忍不動王言汝一身在此無有
勢力雖口言不動誰當信者是時仙人即作誓言若我實修慈忍血當為
乳即時血變為乳王大驚喜將諸女去是時林中龍神為此仙人雷電霹
靂王被毒害沒不還宮

昔有比丘乞食至珠師門時珠師為王穿大摩尼寶珠放珠入屋取食以
施有鵝見珠光潔於是吞而食之師持食出覓珠不見以為比丘偷之拘
逼追索比丘恐被殺鵝取珠隱刃不敢以告甘受鞭笞耳眼口鼻並皆流
血是時彼鵝來趨食血珠師嗔怒打鵝即死比丘見鵝已死涕泣不樂珠
師聞之問比丘言汝何愁惱如是比丘答曰菩薩往昔捨身以救鵝我亦
作是意捨身以代鵝由汝殺鵝故心願不滿足比丘具說上因珠師剖鵝
得珠舉聲號哭語比丘言汝護鵝命不惜於身使我造此非法之事即禮
拜懺悔

嘉言

儒君子有禮則外諧而內無怨故物無不懷仁鬼神饗德○鸚鵡能言不
離飛鳥猩猩能言不離禽獸今人而無禮雖能言不亦禽獸之心乎○賢
者狎而敬之畏而愛之○禮之用和為貴○見賢思齊焉見不賢而內自
省也○楚國無以為寶惟善以為寶○仁親以為寶○仁者愛人有禮者敬
人愛人者人恒愛之敬人者人恒敬之○忠德之正也信德之固也卑讓
德之基也○信以守禮禮以庇身○招携以禮懷遠以德德禮不易無人
不懷○敬賢者存慢賢者亡○道長千載聖遠言湮不以先覺孰開我人

書不盡言圖不盡意風月無邊庭草交翠○明道先生終日端坐如泥塑人及至接人則渾是一團和氣○崇敬師傅所以尊道重教也○愛人者必有天報○見賤如貴視少如長其禮先入其言後出意思無不答禮敬無不報○無不愛也無不敬也無與人爭也恢恢乎如天地之包萬物○致清白之士脩其禮致節義之士脩其道○執禮者常安而終吉無禮者常危而招禍

禪樹立僧寶為良福田令興福力得出生死○僧寶者謂禁戒守真威儀出俗若長若幼皆須深敬○僧者出三界之福田具有戒體戒為萬善之根是故世人歸信供養○常應親善人遠離於惡友以近善人故能捨諸惡業○士有信行為聖所譽○若人漸解懺悔來近知識水澄穢除即自見道

道學道由丹心奉師如至親○供養法師令人世為君子賢孝高才門族昌盛○供養諸道德所生無艱難○供養好道德齋戒見真王靖念心不懈七祖昇天堂○貧窮好道常念施惠○積諸善功供養法師○宗奉師

寶與道結緣世世不絕皆由先身積行所致

感應

唐張武者始為廬江道中一鎮副將頗以拯濟行旅為事嘗有老僧過其所武謂之曰師年老前店尚遠今夕止吾廬中可乎僧欣然其鎮將聞之怒曰今南北交戰間諜如林知此僧為何人而敢留之也僧乃求去武曰吾業已留師行又益晚但宿無苦也武室中唯有一牀即以奉其僧已即席地而寢盥濯之備皆自具焉夜數起視之至五更僧乃起而嘆息謂武曰少年乃能如是耶吾有藥贈子十九每正旦吞一九可延十年之壽善自愛珍重而去出門忽不見武為常州團練副使有識者計其年已百歲常自稱七十輕健如故

昔有一男子於正法出家能為給事所至寺諸比丘等令其給事後轉疲極自思惟言誰能為我說法教化聞摩偷羅國有優波笈多華言是佛所說能於後弟子中最為第一即為作禮合掌言大德大作佛事為我說法優波笈多言能隨我教當為說法答曰能乃曰那哆婆多寺眾僧汝更給

事問曰衆僧有幾答曰有一萬八千羅漢學人一倍精進凡夫無數時彼比丘即為一切衆僧而作給事今一切僧專脩道業時給事比丘早起著衣持鉢入摩偷羅國有一長者朝出相逢長者念言我未曾見而今見之頭面禮足問言大德所從遠近有何事來答言從東國來至優波笈多處為欲聞法而優波笈多今我為僧給事我今不知摩偷羅國人誰精進誰不精進者長者曰汝今不須思惟是事我當代汝給事衆僧一切飲食衣服醫藥我悉給與比丘與長者共取飲食等供養衆僧三月安居時比丘思惟所依功德得阿羅漢果

晉長安有釋曇始者關中人自出家以後多有異迹太元之末賞經律數十部往遼東宣化顯授三乘以立規戒義熙初復還關中開道三輔始是白於面雖跣涉泥水未嘗沾泥天下咸稱白足和尚時長安人王胡其叔死數年忽見形還將胡遍遊地獄示諸果報胡辭還叔謂胡曰既已知因果但當奉事白足阿練華言無誨胡遍訪衆僧唯見始足白於面因茲事之昔有一女人聰明智慧深信三寶常於僧次請二比丘就舍供養時有一

老比丘次到其舍年耆根鈍素無知曉時彼女人齋食已訖求老比丘為我說法獨敷一座閉目靜嘿時老比丘自知階鈍不知說法趣其睡眠棄走還寺然此女人至心思惟有為之法無常苦空不得自在深心觀察即獲初果既得果求老比丘欲報其恩此老比丘審已無知棄他走避倍更慚耻復棄藏避而此女人苦求不已方自出現女人於時具論上恩蒙得道果故賣供養用報大恩時老比丘以慙愧故深自剋責即獲初果是故行者應當至心若至心者所求必獲

昔維衛佛衛徒諸比丘六萬二千初從山出還父王國國王於城外割地立屋處諸比丘有比丘語左右家欲倩作屋男子不許其家老母手自為之屋得成十指皆穿比丘坐中定一夜入火光三昧舍現大火母遙望見念我作屋尋便已燒何薄福乎母入屋故在但於火光中見比丘甚大歡喜壽終生天釋迦成佛天命未盡來下白佛明日飯佛及聖衆默然受之波斯匿王又遣請佛佛曰已受天請王曰未嘗見天人下施何緣有此明日遣人候之不見施辦乃至禺中亦復寂然王初脩館饌若無人為吾當

供之日中天至了不貴食但將諸天玉女鼓諸音樂禮佛而住白曰時到即舉手中衆事自然皆辦行水既訖更舉手出厨百味甘露在地手自斟酌衆會皆足王見驚欣澡畢白佛不審此天宿有何福手出百味福德乃爾佛為王說前世手為比丘作屋從是生天九十一劫手出衆物福尚未

終

昔佛在舍衛國是時摩訶迦葉

佛弟子摩訶迦葉

獨行教化到王舍城常行大慈

福於衆生捨諸豪華而從貧乞欲分衛光人三昧何所貧人吾當福之即入王舍大城之中見一孤母最甚貧困在於街巷大糞聚中傍鑿糞聚以為巖窟羸劣疾病常卧其中孤單零丁無有衣食便於巖窟施小籬柵以障五形迦葉三昧知此人宿不植福是以今貧如母壽命終日在近若吾不度永失福堂母時飢困長者青衣而棄米汁其惡難言母從乞之即以破瓦盛著左右迦葉到所呪願從乞多少施我可得大福爾時老母聞偈歡喜心念前日有臭米汁欲以施之則不可飲遂啓迦葉哀我受不迦葉答言大善母即在窟匍匐取之形體裸露不得持出側身僂體籬上授與

迦葉受之尊口呪願使蒙福安迦葉心念若吾賣去著餘處飲母則不信謂吾棄之即於母前飲訖盪鉢還著囊中於是老母持復真信迦葉自念當現神通令此母人必獲大安即在空中廣現神變時母人見此踊躍一心常跪遥視迦葉迦葉告曰母今意中所願何等即啓迦葉願以微福得生天上於是迦葉忽然不見老母數日壽終即生忉利天上威德巍巍震動天地光明挺特譬如七日一時俱出照耀天宮帝釋驚愕何人福德感動勝吾即以天眼觀此天女福德使然即知天女本生來處

昔陳安世者京兆人也為崔姓本家客稟性慈仁行見鳥獸當道避不欲驚不踐生蟲未嘗殺物年十三而姓本好道思神有二仙人託為書生從姓本家游以觀試之姓本不覺是仙人也久而轉怠姓本在內方作美食二仙復來問安世曰姓本在乎答曰在耳因入白姓本欲出其妻引而止之曰餓書生輩復來求口腹也勿聽於是姓本使安世告言不在二人曰汝向言在却言不在何也答曰叔本家叱我云爾二人善其以實乃相謂曰叔本勤苦有年今適值吾二人而敢懈怠是其不遇幾成而敗乃

問安世曰汝好游戲乎答曰不好也又曰汝好道乎曰好道二仙曰汝常曰好道然無緣知之既而曰審汝好道明日早會道北大樹下安世早往期處到日西而不見二人乃起而去曰書生定欺我耳二人已在道邊呼之曰安世來何晚也答曰早來不見君耳二人曰我端然在汝邊耳如此者三而安世輒早至二人知其可教乃以藥二丸與安世誠曰汝歸勿復飲食別止一室安世承誠二人常往來其處叔本聞安世處有人語聲往輒不見姊本問適聞人語今不見何也答曰我獨語耳姊本見安世不復食但飲水自知失賢乃自悔曰吾慢賢而失之彼誠確而得之也夫道尊德貴不在年齒父母生我非師則莫能使我長生也先聞道者則為師矣乃拔去白髮執弟子之禮朝夕拜事安世為之灑掃安世道成白日昇天臨去遂以要道傳姊本姊本後亦得仙矣

晉南陽滕普累世敬信佛法妻吳郡金氏尤能精苦每設齋會不逆招請隨有來者因留供之後會僧數闕少使人衢路要尋見一沙門蔭柳而坐因請與歸淨人行食翻飯于地傾葷都盡固然無計此沙門云貧道鉢中

有飯足供一衆使普分行既而道俗內外皆得充飽清淨既畢擲鉢空中翻然上升極目乃滅普即刻木作其形像朝夕禮拜普家將有凶禍則此像必先倒踣云普子念以蘇峻之功封東興者也

昔時有一比丘名波拘盧從座而起整服作禮長跪叉手曰世尊曰我念宿命生拘夷那竭國為長者子時世無佛衆僧教化大會說法我往聽經聞法歡喜持一藥果名訶梨勒華言天主持來此果為藥功用至多奉上衆僧緣此果報命終生天下生世間恒處尊貴端正雄傑與衆超絕九十一劫未曾疾病餘福值佛光導癡冥授我法藥逮得應真力能移山慧能消惡善哉福報為真諦矣

宋齊安郡有跛男子其妻病偃僕恒念其疾夙因所致每遇僧伽道士深加禮敬愈久愈度畜植來生福果忽有舊識道人過宿問曰汝皆欲愈疾乎曰固所望也曰吾有善藥因各與五丸遂失道者所在服之皆愈昔房建居舍山郡尚奇好道敬禮道士受六甲符及九章真錄積二十年後游衡山遇一道士風骨明秀與建語為建述上清仙都及蓬萊方丈靈

異之事一一皆若涉歷建奇之旬餘達自衡山適南海道士謂達曰吾嘗客於南海迄今十年矣時有寺官李侯者護其軍李侯以玉簪遺我我以簪賜君君宜寶之達得其簪因而別去是歲秋達至南海一日獨游開元觀觀壯軒有塑真人狀者二東者左玄真人乃視左玄之狀是衡山所遇道士也及觀左玄之冠已亡簪矣時有觀居道士數輩在焉達具以事言次出玉簪示之道士驚曰往歲有李侯護兵於南海嘗以二簪飾左右真人之首迨今且十年其左玄之簪亡之數月矣今君所獲果是焉達益奇之因以玉簪歸道士焉

昔趙公成者患兩脚不能起旦夕存心太上法禮敬道士太上真人賜公成流明壇柏散一劑即能起後得道在鶴鳴山此乃心存行道亦與身行之無異也

昔有一賢者其妻有疾遣价迎一道士禳之道士以事阻不得往即以被褐付之价持褐至家賢者燒香敬禮如見道士忽有一童子至庭自言道士使我来問病賢者方致禮延之坐其妻病即愈童子語賢者曰病者已

愈道士無煩復來賢者可送法服還也賢者如其語躬送法服還道士且道神童將命及妻病愈之故道士愕然曰貧道未嘗遣人亦不知君之良配病愈因問童子形貌何以賢者答言可十五六姿容端正佳麗出人道士歷思弟子中無肖者乃知神人感賢者之誠昭茲靈貺也

昔豫章逆旅梅氏有道僧投止皆不求直常有一道士衣服藍縷止其家梅厚待之一日謂梅曰吾明日設齋可借新瓷椀二十事及七勃君亦宜來於天寶洞前訪陳師也道士持椀渡江去梅翌日詣洞前問村人莫知其處偶得一小逕甚明淨試尋之果得一院有青童應門問之乃陳師之居也入見道士衣冠華楚延坐命食頃之食至乃熟蒸一嬰兒梅懼之不食又進一蒸犬于梅亦不食道士歎息命取所得椀贈客視之乃金椀也謂梅曰子善人也然不得仙千歲人參枸杞皆不肯食乃分也謝而遣之此後不復見

昔樂法師者不知何代人也案之志經云法師姓樂名淨信居業巨富而夫婦皆欽崇大道每以其資儲供山中道士仍作僕隸以奉洒掃具帳席

范用菓藪香藥金珠錦繡寶貝珍玩服飾之物靡不備焉暨夫婦既克終
天年而俱列仙籍有子法解者夫婦亦不違先君之貽訓刻意奉道遂罄
家業以施其山中道士逮至窘涸乃鬻其二子更以供饋匪懈厥初於是
法解夫婦亦終永年率證仙第其二子長曰胤祖次曰胤徹小名阿奴而
阿奴齒及齠齔自能書畫啓談操詞常在人表厥後乃共堅修煉勉勵勤
行果滿功圓並登仙路此三世六人得道者也

唐彭城劉存希自幼以來於唐興觀瞻禮天師葢心圖寫供養因得縮本
出入護持雖祗命遠行奉使南北未嘗一日闕香火之薦黃巢犯闕時在
內署倉惶之際隨駕不及唯捲天師像捧持而行同伴三十餘人皆為虜
捉或被殺傷獨於衆中得免將入南山夜深村落行次遇避難人偶語而
聞妻在其間因得同往時與妻相失已旬日矣

晉鍾嘉字超本許真君之外甥精虔奉道得真之秘要不交人物獨居象
牙湖西以道術救接百姓真君上昇日召之授妙道真訣按而行之元康
二年十月十五日乘碧霞之輦上昇今有古壇石井故宅號丹陵觀

宋汀州人張從善父喪脩水陸追薦次年喪母又作水陸同薦父母既畢
明夜夢父母來曰昨日好齋事吾乘此功德今皆往生西方特來別汝從
善問曰見去年作齋事如何父曰不曾得用其時有一僧來就齋而齋已
罷汝斥去之坐此無有功德昨日汝心甚虔諸僧求齋者汝能誠心禮敬
不間遠近功德大矣從善既覺追憶其事且喜且悔自是益禮敬僧伽

嘉言

儒君子生則敬養死則敬享 孝子為能饗親 事死如事生事亡如事
存孝之至也 慎終追遠民德歸厚矣 宗廟致敬不忘親也

釋為亡人作福如餉遠人若生人天增益功德 若父母兄弟死亡之日
應請法師講菩薩戒經律福資亡者得見諸佛得生天上 男女命終造
作黃幡懸着刹上離八難苦得生十方淨土 志誠念清淨蓮花目如來
兼塑畫形像存亡皆獲報 夙種善根多懷正信傾珍造塔撤寶崇真皆
欲伸其追遠之誠致其如在之敬 人命終時待聞鐘磬增其正念 若
打鐘時一切惡道諸苦並得停止

道凡人命將終時若有正信衆生於其頭邊念玉帝尊號亡者不墮惡報
神昇九天○故正經者上通三天下徹九泉可以追薦冥爽超度祖玄○
對三寶稱揚為先亡首過務在精嚴必彰福利○為先亡父母億劫種親
寫造三十六部尊經拔度神魂其福無量○其人孝道能修十二福功德
必達天曹亡靈永離地獄悟道登真燈一修像二寫紅三齋戒四福在五香
齊十除心徑十一○鍊質八仙真遂成金剛體超度三界難地獄五苦解
慈悲捨十二平等

感應

宋真道祖池州人也以宣和甲辰秋喪母追慕無已聞太平州田功曹常
以天樞法救人病苦能追攝死魂以詰升沉道祖見其靈異遂具狀乞行
拯拔功曹受狀判押燒化令神將即時追攝道祖母氏到壇問曰冥司如
何母對曰若作六六功德幽冥普獲霑恩妾即得超生功曹復問曰何謂
六六答云黃籙大齋道祖泣告曰見身計未成何緣有力為大功果母曰
不然但志心專誦道教太上救苦經及太一救苦天尊御號冥司簡奏上
天功即應聲至矣又曰冥司限促不敢久留乃作禮而去道祖即告功曹

求受太上救苦經及天尊御號日夜虔誦各積千遍具疏焚化是夜
母見夢於道祖曰汝今不負鞠育之恩誦經持號誠格高真蒙上帝符命
我已得生天自今無復見汝汝宜自勉言訖乘雲冉冉而去
宋芮興勇略之將也自金人南侵在荆湖淮漢間凡經數十戰未嘗喪師
乞昇祠朝廷從之閒居禮佛以樂餘生如此十年一夕昏黃時門首有一
二千人皆舊日受撥者左右之人皆不見而芮獨見之遂出門而問曰汝
何故來此衆人曰平生在大尉軍中荷有威望得全此生不料兩三年皆
為帶血之鬼徑來告訴芮曰教我如何衆人曰特求薦拔芮曰汝衆且去待
吾理會芮後達水陸大齋及九幽章醮超拔之旬日後夜靜獨坐小室又
見在前一二十人皆循墻而下遂喚家人僮婢於前指示之未久芮但叫
曰佛來佛來合掌而化
宋太學博士莊安常宜興人因妻亡於金山設水陸冥會資薦薦夜深事畢
暫寄榻上夢妻來冠服新潔有喜色脫所著鞋在地襪而登虛漸騰入雲
表始沒驚覺以白于僧及他人皆云生天也

唐吏部侍郎盧從愿父素不事佛開元初選人有暴亡者以筭未盡為地下所司放還既出門逢一老人著枷謂選人曰君已得還我子從愿今居吏部若選事未畢當見之可為相諭已由不事佛今受諸罪備極苦痛可速作經像相救其人既活於銓司為說之從愿涕泣請假寫經於佛前念誦以資救拔後十餘日其父詣選人辭謝云已生人間可為白兒言訖不見

唐吳可久越人元和十四年寓居長安奉摩尼教妻王氏暴亡經三載見夢於吳曰我為邪見今作一毒龍在皇子陂浮圖下明日當死願為請僧就彼誦金剛經冀免他苦吳夢中不信叱之王氏唾其面驚覺面色腫痛不可忍王氏復託夢於可久之兄曰園中取龍舌草搗塗之立愈兄寤依其言即愈詰旦兄弟同往其地請僧誦經以薦拔之俄有大蛇從塔邊出舉首徧視經盡而斃後夜復夢王氏來謝曰得誦經相救吾託生人世矣可久自此歸信佛法

宋高邦佐簿眉山忽丁父憂於二七夜被攝至冥司見其父責曰汝齋祭不誠僧與庖者皆不嚴潔無益於我但汝每日所焚九天生神章皆於我功德有餘傍及諸凶汝若更請高明道士看誦及多焚化吾將脫離幽局矣邦佐如戒後父托夢曰得汝生神章薦拔之力已托生矣

唐西京宜陽縣劉楫字巨濟年二十七歲家產豐盛嘉祥四年二月初八日乘馬遊香山寺燒香罷出寺一相者指巨濟言公衣祿豈厚其壽不永三旬允宜慎福劉楫見言悶悶而歸謂其妻曰吾雖富足壽命不長奈何相者令我慎福何如妻許氏告我家鞏縣臨河倚山冤魂無數傷害百姓此王世充與李密戰時陣亡之人不得超生宜乎薦拔此可為之須得有德行高人仗其威力可救之楫曰往三清宮請大師孫真人何如妻曰善巨濟詣上清宮謁孫大師臨近二三里遙觀花樹下二三人立馬一足既近見紫服乃孫真人也真人曰吾等公多時何來晚矣劉楫驚拜曰真人何知真人曰予昨日往洛陽買香茶回至柳堤下天色欲晚見數百人皆跪拜告曰我等皆陣亡之鬼無由超度荷劉公欲設齋薦拔望真人慈憫早令脫生言訖忽然而去今日故遠來接君遂議定清明日設醮專薦陣

亡孤魂楫告歸至所期之日備車馬取至真人設醮之夕天門上群鶴飛繞壇上是歲洛京風雨均調並無灾崇其醮大達後真人寄書與巨濟言夢中鬼來謝云與君告天請壽可延三紀巨濟後於洛陽天津橋上見一相者曰公作何福面上有陰德之氣觀公之貌壽可延三紀劉曰別無陰德止做醮救拔孤魂設齋三日而已相者曰救死拔亡其功甚大楫後以才德任洛陽主簿及生五子壽年六十六歲善終

昔汴州都押衙朱仁忠家有門客許生暴卒隨使者入冥經歷之處皆如郡城忽見地堆粟千石中植一碑曰金吾將軍朱仁忠食祿生極訝之洎至公署使者引入一曹司主吏按其簿曰此人乃誤追之矣謂生曰汝可止此吾將白於陰君然慎勿窺吾簿吏既去生潛目架上簽牌曰人間食料薄生潛憶主人朱仁忠不食醬可知其由遂披簿求之多不曉其文遂巡主吏大怒已知其不慎瞋目責之生恐懼謝過告吏曰某乙平生受朱仁忠恩知其人性不食醬是敢竊食簿驗之願恕其罪吏怒稍解乃於仁忠名下注大豆三合吏遂遣前使者引出放還其徑路微細隨使而行忽

忽見一婦人形容顛顛衣服縷縷抱一孩子拜於路傍謂生曰妾是朱仁忠亡妻頃年因產而死竟未得受生飢貧尤甚希君濟以資緡數千貫生以無錢辭之婦曰所求者楮貨也君還魂後可致而焚之兼望仁忠與寫金光明經一部懺之可指生路也既而先行直抵相國寺將踰其闕為使所推踣而寤仁忠既悲喜問其冥間之事生曰君非久必任金吾將軍言其碑粟之事又話見君亡妻言其形質無差後與仁忠同食乃言自君亡後忽覺醬香今嗜之頗甚乃是注大豆三合之驗也自爾朱馮經畢許生燔紙數十其婦於夢中辭謝而去云今得超生矣朱果為金吾將軍顯晦之事不差毫釐矣

宋平江虎丘寺沙彌法明因見水濱多橫亡者每夜誦金剛經施食追薦忽因赴緣夜歸過危橋足跌而墮自覺身如浮雲中間雜遶之聲云我等救之此誦經薦我之沙彌也及甦而身在岸上遍身有經幡之輝因此愈加精嚴脩進功倍於前後感鬼神致謝云

宋馬述尹年十八隨父肅夫調官京師抱疾而終有姊嫁常州稅官秉義

郎李樞母留姊家不知子之亡李氏婢忽如狂作男子聲曰我即馬述尹也某月某日以疾死今幾月矣欲一見吾母與大姊故附舟來欲丐佛果以助超生母與姊始聞之悲駭扣之而信遂許其請婢乃不言即名太平寺僧誦經具饌寫疏以薦明日婢復語云荷吾母與吾姊薦拔如此但某僧看經至某處上某僧至某處上功德不圓為可惜爾其母未深信試呼僧責之皆慙謝而退亟更誦焉

宋朝散大夫池州通判丁餽妻壽昌縣君施氏病卒於官舍越十四日子愉夢母如存且曰我將往生於淮南然猶為女人壽復不永所以然者以宿負未償也汝與汝父言亟營勝事使我得轉為男子愉覺以告父後數日其孫百朋又夢經一官府衛卒羅陳方迤而過或呼于後曰縣君在此安得不省謁遂回入府門至東廡簾下果見之言曰吾於此蕭然無親舊而旦暮有趨府之勞幸以命婦得乘車不然則徒行嬰拘繫之苦矣語未畢簾外吏曰可疾去判司知之不可也施氏亦曰可去矣既出門又有呼者曰判司台乃由西廡進見綠衣人據按熟視之則故潭州通判李絳承

議也百朋憶其與乃祖同年進士升堂再拜曰公與祖父同年世契不薄願母各拜綱受之既坐詢大夫安否甚悉少頃吏引施氏就訊百朋離席絳曰施縣君與子親歟曰新亡祖母絳曰天屬也百朋曰如聞已有往生之緣而未脫女身信否曰然昨日符已至百朋泣曰祖父昔送公將今祖母生緣在公馨歎苟得轉為男存沒皆被厚德矣絳曰柰事已定何百朋哀祈數四絳曰子少俟當試為圖之於是絳出循廡而上迤邐升殿中若無影響湏臾復下則左右翼扶步武詳緩笑曰已遂所請然歸湏誦佛說月上女經及不增不减經以助度生可也百朋拜謝而退視祖母猶立階下大言曰二經多致之勿忘也遂寤盡記其說餽且驚且疑曰二經之名所未嘗聞訪諸軋明院果得之乃月上女以辯才聞道如來授記轉女身為男及慧命舍利弗問佛以三界輪迴有無增減之義餽始歎異擇僧之賢及令家人女子皆齋潔持誦數至千卷設冥陽水陸齋以侑之迨百日餽夢妻來曰佛功德不可思議蒙君追薦之恩今生於廬州霍家為子矣謝訣而去

宋臨江軍慧力寺初造輪藏成寺僧限得千錢則轉一匝有營婦喪夫家極貧念為轉藏以資冥福累月辛苦收拾隨聚隨費終不滿一千迫於貧乏無以自存而此心眷眷不能已遂携所聚之錢踰泣藏前擲錢於地輪藏自轉圍寺駭異自是不復限數云

宋祝堯卿云有士大夫自浙西赴官湖外妻絕美舟過楊子江大風作於金山寺下舟覆妻孥盡溺唯大夫賴小艇得脫就寺哀慟累日然後去三年秩滿東還復留故處就寺設水陸供薦禱于佛乞使妻早受生罷時已四更少焉童奴掃地逢一婦人滿身流淚如澆涎裸跣抱柱如醉如癡喚之不應黎明僧衆聚觀大夫亦至細認之乃其妻也駭怖無以喻命加薰燎具湯藥守之至食時稍稍知人自引手接湯俄而復活夫婦相持而泣遂言其故曰我初沒時如被人拖脚引下喫數口水入水底為綠衣一官人推入穴穴高且深置我土室中以我為妻每夜袖糕餅之屬飼我未嘗茹葷問其安得此物初猶笑不言及既眩熟方云是水陸會中得來因告之曰我因悶已久試帶我出瞻仰佛事少快心如何彼堅拒不可求之屢

矣一夕導我攀險梯危上寺中望燈燭與香花列布及詣香案遙聽讀疏乃是君官位姓名追薦我者料君在此盤旋繞寺不肯返綠衣若見促我故逗留會罷燭滅強拽我行我聞君咳聲頭見不得緊抱廊柱不放遭毆打極困他怕天曉始捨去此身墮九泉之下不知歲月賴君復生皆佛力廣大所致耳喜甚而哭夫亦哭遂為夫婦如初滿寺之人莫不驚異綠衣者蓋水府判官也

北齊時有士人姓梁甚豪富將死謂其妻子曰吾平生愛奴馬及皆使用日久稱人意吾死以為殉不然無所乘也及死家人以囊盛土壓奴殺之馬猶未殺奴死四日而蘇說云當不覺去忽至官府門人因留止在門所經一宿明旦見其亡主被鎖以兵守衛入官所見奴謂曰我謂死人得使奴婢故遺言喚汝今各自受其苦全不相關今當白官放汝言畢而入奴從屏外窺之見官問守衛人曰昨日壓脂多少乎對曰得八斗官曰更將去壓取一斛六斗主則被壓牽出竟不得言明旦又來有喜色謂奴曰今當為汝白也又官問得脂手對曰不得官問何以主司曰此人死三日

家人為請僧設會每聞經唄聲鐵梁輒折故不得也官曰且將去主司白
官請官放奴即喚放俱出門主遣傳語其妻子曰賴汝等脩福獲免大苦
然猶未脫更能造經像以相救濟異因得免自今無設祭既不得食而益
吾罪言畢而奴遂重生具言之家中果以其設會於是傾家脩福練行
宋順陽郭銓字仲衡為益州刺史亡後三十餘載元嘉八年忽見形詣女
婿南陽劉凝之家車衛甚盛謂凝之曰僕有謫事可見為作四十僧會當
得免也言終不見劉謂是魍魎不以為意後夕銓又與女夢言吾有謫罰
已告汝婿今為設會不能見矜耶女晨起見銓從戶過怒言竟不能相救
今便就罪女號踊留之問當何處設齋答云可歸吾舍倏然復沒凝之即
時供辦會畢凝之一夕夢銓來相謝曰感君厚恩事始獲宥言已失去於
是而絕

晉闕公則趙人也恬放蕭然唯勤法事武帝之時死于洛陽道俗同志為
設會于白馬寺中其夕轉經宵分聞空中有唱讚聲仰見一人形器壯偉
儀服整麗乃言曰我是闕公則今生西方安樂世界與諸菩薩共來聽經

合堂驚躍皆得覩見時復有汲郡衛士度亦苦行居士也師於公則其母
又甚信向誦經長齋家常飯僧時日將中母出齋堂與諸尼僧逍遙眺望
忽見空中有一物下正落母前乃公則鉢也有飯盈焉馨氣充勃闔堂肅然
一時禮敬母自行分齋人食之皆七日不飢士度善有文辭作八關懺文
晉末齋者尚用之永昌中死亦見靈異有浩儀者作聖賢傳云度亦生
西方

唐開元中亳州太清宮王師薦父誦玉皇經萬餘遍無驗生懈心遇老叟
授以善本加誡誦之三日忽夜半見其父環佩玳瑁仙服下降言吾因汝
誦玉皇經已享天福位居仙列言訖上昇

宋偽齊劉豫同金虜入寇高宗下詔親征九月親詣天竺大士殿焚香恭
禱蚤平虜既而淮東宣撫使韓世忠敗金人齊人于潤州世忠獻俘行
在因陳戰歿之人乞加贈恤上蹙然曰死於鋒鏑誠為可憫即勅直學士
胡松年具詞達水陸大齋以為濟度是夕有見鬼神來甚眾有夢戰死者
咸欣然相慶以為自此得生善道

唐長安通軌坊劉公信妻陳氏其母因病先卒陳氏忽暴亡見一人引入地獄備觀諸罪相後見一獄石門忽開母在其中受極重苦母見女曰汝可為吾寫法華經一部使吾脫免此苦言已門閉陳氏再蘇說之公信即憑妹婿趙師子寫是經忽有經生持新寫蓮經一部來質錢趙言幸有此經可贖之不必寫也劉從之裝束訖授與陳氏陳氏一日設母食供養焚化是經其夜乃夢曰吾先令汝寫經一部何不為之女曰已為贖一部訖母曰吾為此經增受重罪獄卒打吾脊破以不合取范家經為已有故女夢覺急請人書之既成請僧表懺又夢母曰吾承經薦拔之力已脫冥司好處安身今未報汝汝當信心好住世間及詢前經果是姓范人寫時龍翔中也

唐瑯琊王之弘貞觀中為沁州和川縣令有女適博陵崔軌軌於和川會病而卒卒經數十日其家忽於夜中聞軌語聲初時傾家驚恐其後乃以為常聞語云軌是女婿不合於妻家立靈但以苦無所依為置立可也妻從其請又具說獄中事云人一生恒不免殺生及不孝自餘之罪蓋亦小

耳軌雖無罪然必大資福助合為軌數設齋供并寫法華金剛般若觀音等經各滿三部以此功德資我冥途自茲以後即不復來王家一依其言寫經設供軌忽來謝曰承寫經功德矣今即取別舉家哭而送之曰云軌有遺腹之子已年四五歲此子後必仕宦願善養畜自此以後不復更來矣

隋開皇中有僧慧超立行卓爾常誦法華師有一弟子善緣年在志學亦通蓮經三卷一日病死超往泰山焚香具述來意木偶忽發聲曰師戒行精苦所問敢不咨白遂引至府君前超白曰弟子今在何處君曰善緣在此未有生處超曰欲與相見得否君即遣使領東行數十步果得見因問苦樂如何弟子曰但被拘繫亦無苦樂念生處未定願師并濟之師曰作何功德弟子曰乞造法華經一部設齋一百負師既歸即書經飯僧事訖復謁府君君相接如先師陳所為君曰善緣師寫經題妙字始成便生勝處師曰生何處君曰還生齊郡王武家為男子待三歲可往覓之超過三年即往問曰檀越之子欲得相見王氏抵拒不言有子師遂具說府君之

言其妻在室語夫曰法師靈感若此可使見之即抱兒出一見師走入懷抱悲泣良久及年長大志願出家還事超師

隋僧行堅不知何許人常脩禪觀節操嚴甚因事經游泰山日夕入獄祠度宵吏曰此無館舍唯有神廡下然而宿此者必暴死堅曰無妨遂為藉蒿於廡下堅端坐誦經可一更忽見其神衣冠甚偉向堅合掌堅問曰聞宿此者多死豈檀越害之耶神曰當死者特至聞弟子聲而自死非殺之也又問之曰世傳泰山治鬼是否神曰弟子薄福有之堅曰有兩同學僧已死今在否神問名字曰一人已生人間一人在獄受對師往見之神遣使引入墻院見一人在火中號呼形變不可識而血肉焦臭堅不忍觀即還廡下復與神坐堅曰欲救是僧得否神曰可能為寫法華經必應得免既而與神別明旦廟令視堅不死訝之堅去急報前願寫經裝畢賁而就廟神出如故以事告之神曰師為寫經題目彼已脫去此苦復生人間矣然此處不潔不宜安經願師還送入寺中供養遂與神別宋僧慧果豫州人幼不如輩止京師瓦棺寺誦法華諸經嘗於廁中見一

鬼致敬云昔作維那小不如法墮穢糞鬼中某嘗有錢三千埋柿樹下法師慈悲願取之為植福薦拔師即告衆取錢寫法華經一部後忽夢此鬼謝曰已得改報大勝前日

唐咸亨二年三月長安法海寺英禪師有異人來謁曰弟子知有水陸齋可以利益幽冥自梁武殂後因循不行今大覺寺有吳僧義濟藏此儀文願師往求之以來月十五於山北寺如法脩設苟釋控牢敢不知報英尋義濟果得儀文即以所期之日於山北寺如法脩設次日曛暮向者異人與十數輩來謝曰弟子秦范睢也指其徒曰此穰侯此白起此王翦此張儀此陳軫皆秦臣也各生本罪幽囚陰府大夜冥冥無能救護昔梁武帝於金山寺設此齋時前代之臣皆免所苦弟子爾時亦暫息苦然以獄情未決不得出離今蒙吾師設齋弟子與此徒輩皆乘善力將生人間慮世異國殊故此來謝言訖遂滅自是儀文布行天下作大利益宋沙門僧妙者上黨人也家姓馮氏居于江陵上明村妙遊乞零陵因居郡治龍華精舍善於蓄聚米至數千斛後數年龍華寺突焚蕩盡妙臨

終以財物付弟子法宗令造講堂僧房法宗立堂畢頗拖延曰未得建房
至泰始三年正月被疾甚篤時有道猛比丘隨泉陵令高陽許靜慧在縣
縣即郡治之邑也猛往省法宗之疾入寺數步見一沙門着桃花布裙單
黃小帽行且罵云小子法宗違處分不立僧房費散財物既見道猛如驚
羞狀以帽蒙頭入法宗房猛嘗往未此寺未嘗見此沙門不欲干突之先
見法超道人說所聞見超疑猛或許妄檢問形狀音氣猛具言之超曰即
法宗之師也亡來數載共歎悵之其夕即靈語使急召法宗法宗既至數
罵甚嚴猶以僧房為言聲音氣調不異平生法宗稽首謝之既畢問和尚
今生何處善惡云何妙曰生處粗可耳但應受小過二年外乃可得免
有小柳橫欲訴所司為無袈裟不能得行可急為製也法宗曰袈裟可辦
未審和尚云何得之妙曰汝可請僧設供以袈裟為觀我即得也法宗如
言飯僧親衣道猛時在會又見僧妙倚柱堂戶之外拱立聽經飯觀訖猛
即見袈裟已在妙身矣

昔佛在舍衛國祇樹給孤獨園大目犍連

佛弟子名始得六通欲度父母報乳

哺之恩即以道眼觀視世間見其亡母生餓鬼中不見飲食皮骨連立目
連悲哀即以鉢盛飯往餉其母母得鉢飯便以左手掌鉢右手搏食食未
入口化成火炭遂不得食目連大叫悲號涕泣馳還白佛具陳如此佛言
汝母罪根深結非汝一人力所奈何汝雖孝順聲動天地天地神祇邪魔
外道道士四天王神亦不能奈何當須十方衆僧威神之力乃得解脫吾
今當說救濟之法令一切難皆離憂苦佛告目連十方衆僧七月十五日
僧自恣日當為七世父母及現在父母厄難中者具飯百味五果汲灌盂
器香油挺燭牀敷卧具盡世甘美以著盆中供養十方大德衆僧當此之
日一切聖衆或在山間禪定或得四道果或在樹下經行或六通自在教
化聲聞緣覺或十地菩薩大人權現比丘在大衆中皆同一心受鉢和羅
飯又云鉢和羅華言自恣食具清淨戒聖衆之道其德汪洋具有供養此等自恣僧者
現世父母六親眷屬得出三塗之苦應時解脫衣食自然若父母現在者
福樂百年若七世父母生天自在化生入天花光時佛勅十方衆僧皆先
為施主家呪願願七世父母行禪定意然後受食初受食時先安在佛前

塔寺中佛前衆僧呪願竟便自受食時目連比丘及大善薩衆皆大歡喜
目連悲啼泣聲釋然除滅爾時目連母即於是日得脫一劫餓鬼之苦目
連復白佛言弟子所生母得蒙三寶功德之力衆僧威神之力若未來世
一切佛弟子亦應奉盂蘭盆正云烏藍婆字華言救度救度現在父母乃至
七世父母為可爾否佛言大善快問我正欲說汝今復問善男子若有比
丘比丘尼國王太子大臣宰相三公百官萬民庶人行慈孝者皆應先為
所生現在父母過去七世父母於七月十五日佛歡喜日僧自恣日以百
味飲食安盂蘭盆中施十方自恣僧頭使現在父母壽命百年無病無一
切苦惱之患乃至七世父母離餓鬼苦生人天中福樂無極是佛弟子脩
孝順者應念念常憶父母乃至七世父母年年七月十五日當以孝慈憶
所生父母為作盂蘭盆施佛及僧以報父母長養慈愛之恩若一切佛弟
子應當奉持是法時目連比丘四輩弟子歡喜奉行
昔有婆羅門華言夫婦二人無有兒子財富無數臨壽終時自相謂言各
當吞錢以為資糧其國俗法死者不埋但著樹下各吞五十金錢身爛錢

出國中有一賢者行見愍之泣然流涕傷其慳貪取為設福請佛及僧盡
心供辦鮮飯佛前稱名呪願時慳夫婦受餓鬼苦即生天上
昔有一羅漢福度衆生因次教化遇一女人字曰光目設食供養羅漢問
之欲願何等光目答言我以母亡之日資福救拔未知我母生處何趣羅
漢愍之為人定觀見光目之母墮在惡趣受極大苦羅漢問光目言汝母
作何行業今在惡趣受極大苦光目答言我母所習唯好食噉魚鱉之屬
所食魚鱉多食其子或炒或煮恣情食噉計其命數千萬復倍尊者慈愍
如何哀救羅漢愍之為作方便勸光目汝可志誠念清淨蓮華目如來薰
塑畫形像存亡獲報光目聞已即捨所愛畫佛像而供養之復恭敬心悲
泣瞻禮忽於夜後夢見有佛身金色晃耀如須彌山放大光明而告光目
曰汝大慈愍善能為母發如是大願吾觀汝母過是報後當生無憂國土
壽命不可計劫後成佛果廣度人天數如恒河沙
昔罽賓國有一長者本大富父母亡後常供養數道人數年之中家欲貧
困無復有得為父母作福念之愁毒婦與婿言可於富家傭作得金以用

布施遠使父母得福無量長者言然於是夫婦同至富家就傭求直得金
施盡乃復傭作富家遣夫耕田婦厨下炊耕得大石如似磨蓋發視見金
千兩便還覆之不復還食富家遣婦餉夫夫便擔金自歸其家明日稱金
還了富家夫婦返舍復為七世父母布施用之終身不盡

昔佛在舍衛國祇樹給孤獨園時彼城中波斯匿王後宮妹女名曰善愛
年在老邁極大慳貪不好惠施時大目連欲化彼故著衣持鉢以神通力
從地湧出住老母前從其乞食老母瞋恚不肯布施飯食已訖有一殘果
及洗器水臭而不噉爾時目連即從乞索老母瞋恚尋即持與目連得已
躡身虛空作十八變時彼老母見是變已心懷信敬歸誠懺悔即於其夜
便取命終生曠野中在一樹下食果飲水以自存活致經數時波斯匿王
將諸群臣遊獵射戲馳逐群鹿渴之欲死遙見彼樹希望有水馳奔趣向
去樹不遠有火焰起遮不聽近但遙見人坐其樹下王即遙問汝是何人
在此樹下彼即答言我是波斯匿王後宮妹女年在朽邁名曰善愛不好
惠施命終生此唯願大王慈悲哀憐愍為我設供請佛及僧使我脫此弊惡

之身王即問言為汝設福可得知否彼人答言設福必得王自當見爾時
波斯匿王聞是語已勅諸兵衆相去百步安置一人令聲相承還歸城內
為其設供請佛及僧若彼得福使諸兵衆各各承聲須臾聞我今知虛實
尋即為設請佛及僧呪願已竟彼樹下人百味飲食自然在前時波斯匿
王以知為實即於佛前深生信敬佛為設法得須陀洹果

唐赫連寵者靈州定遠縣人也父綜領軍於邊上殺降兵一千餘人武德
二年八月死於邊上冥司論對受諸罪苦寵恧不知寵時為靈州押衙貞
觀八年奉使入京因與友人遊終南山行至炭谷前有道士拂景通結廬
脩竹間三百餘歲寵醉歇廬前謂景通曰吾饑有何所食景通素不飲食
笑而不對寵令左右取火焚其廬室景通曰汝父屈殺生民見受罪地府
不能脩善救父更害於吾寵曰何以知之景通曰汝坐於此吾與汝喚令
汝見之言訖書一符擲於空中逡巡有黑雲至於廬前雲中有二十餘鬼
領一人枷杻鎖械來景通謂曰汝子不孝不能救汝寵見之果父綜也悲
泣謂父曰何故受苦如斯父曰吾殺降兵被他冤訟於地獄下受諸罪苦

汝何故更毀真人今吾展轉罪重寵削副悲哀懺悔謝過景通曰汝要免
父之罪情黃籙道場可以救拔必得汝父生天遂巡父被諸鬼領去寵乃
禮謝景通入城於三洞觀設黃籙道場七日夜至第五日見父乘雲氣而
來謂寵曰吾奉天符采黃籙功德已生天堂凡是所殺冤鬼皆已托生人
世

蜀主孟昶往祈青城山見女真麻姑致齋壇側時有獻美女張氏者遂納
之名曰麗華同處于丈人觀忽一夕迅雷掣電暴雨猛風掀拔屋宇騰空
散落張氏遂殞命乃葬山下後數十年上元節丈人觀道士李若冲夜歸
憇於山前忽竹陰有一女子踰泣而出詣若冲前賦詩云獨卧經秋墮髮
蟬白拂風起不成眠澄思往日樹房寵淚濕衣襟損翠鈿言訖復泣而退
若冲還觀見丈人殿上有衣冠朱履之士皆面北立如有奏對殿下廊廡
間列諸罪人見獄卒引一女子繫於鐵柱杖之踰泣痛楚徐察之乃山前
逢之者俄頃善神以劍指若冲曰今夕上元天官泊五嶽丈人校勘生死
罪目不宜久立若冲乃潛避達旦具白其師唐洞鄉唐曰汝知之乎此乃

張麗華也昔寵幸於此褻瀆上真致獲斯罪既以詩告汝汝當救之曰何
法可救曰但轉九天生神章十卷奏金籙白簡可免此苦即自托生偶遇
臨邛牧田魯儔設黃籙若冲遂置簡書與疏轉經十過投仗醮所因而救
度誦至九卷適丁焚簡之時若冲即回向而焚之明日張氏所葬之地有
沙字四句云符吏匆匆扣夜扃便隨金簡出幽冥蒙師薦拔息非淺領得
生神九過經若冲諦觀大上垂教憫諸衆生故立救拔之門以濟生死之
路欲超度先亡者當崇此教也

唐開元二十六年成都張益為長史自少克孝因失怙恃哀毀過禮遂舍
家入山誦玉皇本行集經祈薦父母以報養育劬勞之恩異生極樂之處
日夕持經不絕旦夕懇禱念念不已如是六年殊無顯驗遂疑經典無功
欲生退心忽於庵側遇一老翁儀容奇異語張益云非是經典無靈驗亦
非君不盡心此乃去聖時遠翻寫差錯經文脫略遂失其徵老人即以杖
指庵中經云取耒老夫驗之也益乃取跪而授之翁開卷誦之曰果誤矣
遂取筆改正改畢忽失翁之所在止見有一經集在石上開之卷軸不動

乃新經一卷也蓋望空頂禮方知聖賢變化倍加虔誠專心奉持得七日
亡父母忽來謂孟曰墮在地獄備受衆苦承汝精神福力近得生天今現
故身表功德爾乃自天宮來言訖幢蓋自空接引而上

宋元祐七年相州范輝妻梁氏六月內以疾亡其夫專為持誦本行經并
玉皇大帝聖號極其精勤終月不輟忽一日夢其身飛昇上過天門見
綵霞滿空異香襲人瑶林寶樹森列無數清風徧觸皆作玲瓏之聲已覺
非凡又見宮殿星列廡下設一虛榻上題云此梁氏之靈范悟是其妻因
左右顧忽一綵衣童子傍立范問之曰梁氏何由致此其人安在侍童曰
梁氏致此乃因君為持誦玉皇本行集經及念玉皇大帝聖號之力今
得快樂已遷天仙矣范感其言益生敬仰又見其傍有紙錢灰爐并紙卷
極多或留在案上或如紙灰飛下者又問侍童侍童曰此乃人間功德疏
但其念誦至誠染寫真謹者乃留不然擲去范愈生信心俄然而覺即是
年七月十四日也

隋京師大莊嚴寺釋智興俗姓宋氏涪州人也勵行堅明依首律師誦經
持律昏曉不替大業五年仲冬次當維那鳴鍾依時僧徒無擾同寺僧名
三果者有兄從煬帝南幸江都中路身亡通夢其妻曰吾行達彭城不幸
病死由齋戒不持今墮地獄備經五苦辛酸今月初蒙禪定寺僧智興鳴
鍾發響聲振地獄同受苦者一時解脫今生樂處思報其恩汝可具絹十
疋早奉與之并陳吾意妻遂驚寤恠夢所由與人共說初未之信尋而重
夢後經十日凶告奄至恰與夢同乃奉絹與之而興自陳無德並施大衆
闍寺僧咸問興曰何緣鳴鍾乃感斯應興曰餘無他術見法藏傳云罽膩
吒王受苦由鳴鍾得停敬遵此事輒力行之不以為苦兼鳴鍾之始先發
善願願諸賢聖同入道場同受法食然後三扣將欲長打必先致敬願惡
趣聞鍾聲俱得離苦速得解脫如斯願行志常奉脩豈期微誠遂能遠感
咸曰善哉

宋何曇遠廬江人父萬壽御史中丞也曇遠年十八丁父憂哀毀過甚踊
踴之外請僧法含為佛事薦拔父靈其夕轉經畢衆僧已眠曇遠忽見佛
身自西方而至黃金色相光焰丈餘幡花繽紛充滿虛空其父亦在其中

呼曇遠曰吾得佛力已登西方極樂世界矣曇遠稽首百拜忽然不見惟宅中芬馨數日

宋龍圖閣待制楊琰和王存中之子也至孝既喪考妣著存不忘于心軋道七年三月十三日夜夢見父和王與母夫人偕龍圖閣夢中省記考妣已棄諸孤恐亟去懇留十日之款和王許之龍圖再拜勸酒委曲如生之禮龍圖泣和王及夫人亦泣龍圖稟考和王尋常所脩功德燒獻錢馬人物用得否和王曰用得再問釋道功果孰勝和王云一同但舉手翻覆龍圖又問世間經文孰勝和王答云陰府深敬金剛般若波羅蜜經汝若為吾印施一千卷最為第一龍圖意謂欲其用即對云容造以獻和王曰可時已暮矣頃之有一急足從水中行來報酉時有金字牌過楚州龍圖再問大人今在何處和王云吾管地部方春戀間忽然夢覺不勝悲感淚流枕席遂念和王英爽不昧神色如生蓋和王為宋大將歷百戰戡定禍亂大功不一受降不殺全活甚衆入危殿陞垂四十年未嘗妄刑一人忠厚明恕宜得功德之助有所主宰且晤人間所脩功德看誦金剛經文所焚獻

者陰府皆得用之又知善惡報應冥陽一趣無間彼此亦足以勸世之為善者也龍圖後於釋迦世尊降生之日就資福禪寺脩設天地冥陽水陸大齋一會及齋僧若干如法脩禮金光明三德妙懺一七晝夜命僧衆誦金剛般若波羅蜜經一歲資二親冥福也後又夢二親語龍圖曰吾見純孝近所作者吾皆得之矣

嘉言

儒見其生不忍見其死聞其聲不忍食其肉是以君子遠庖厨也○仁民而愛物○口體之欲何窮之有每加節儉亦是惜福延壽之道○天地之德莫大於好生萬物之情莫甚於愛生

釋仁慈利物安隱衆生○慈仁不殺則壽命延長○恕已愍彼以慎傷暴○若能調心慈悲愍物隨所施行皆成大善○慈悲之道救拔為先○寧當殺身破眼目不忍行殺食衆生○仁無亂志慈最可行愍傷衆生其福無量○大悲之化救苦為端弘誓之心濟生為本○好積諸德慈愍衆生不害衆生是為梵行○物有性物有命物好生物惡死有血氣之屬皆然

也聖人所以欲生而惡殺○生殺有因果善惡有感應○不侵害人損身濟物不自惜已忍辱仁和○常行放生生生受生

道常善救物故無棄物○制殺生者天也順性命者人也非逆天者勿伐非逆人者勿殺○昆蟲草木猶不可傷○齊同慈愛異骨成親○含血之類有急投人能為開度濟其死厄見世康彊不遭橫惡○常行慈心愍濟一切放生度死其功甚重○救濟萬物世世受祿○一切諸衆生貪生悉懼死我命即他命慎勿輕於彼○所居快樂無灾厄者從放生救物不害衆生中來○濟度鳥獸蠢動含靈施捨財物普救饑寒功德最為第一

感應

漢武帝鑿昆明池習水戰池通白鹿原人釣魚于原綸絕而去魚夢於武帝求去其鈎明日帝遊戲于池見大魚銜索曰豈非昨所夢乎取魚去鈎而放之帝後得明珠蓋魚之報也

鳥道王以兵塞之詰朝欲盡其類既曉兵合有一巨鹿突圍至王前跪請曰我鹿首也為王見逐逃死無地然古者不掩羣故仁及走獸鹿與人雖異其愛惜命則一吾願日輸一鹿使王庖不虛吾類亦得蕃息何如王乃擲弓曰汝鹿王也汝愛鹿何異吾愛民乃下令殺鹿者與殺人罪同後吳侵楚萬鹿乘月黑奔吳軍若萬馬聲吳軍驚遁鹿王因見楚王叙其報恩曲折楚王愧感於是為鹿王立廟

晉咸康中豫州刺史毛寶戍邾城令一軍人於武昌市買得一白龜長四五寸置瓮中養之漸大放江中後邾城遭石季龍之敗赴江者莫不沉溺獨毛寶被甲投水中覺如墮一石上須臾視之乃是所放白龜既得至東岸龜乃回顧而去

晉孔愉嘗至吳興餘干亭見人籠龜於路愉求買而放之至中流回顧視愉數四及愉封餘干亭侯而鑄印龜首迴屈三鑄不正有似昔龜之顧靈德感應如此愉悟乃取佩焉

晉晉陽守宗炳林得十頭龜付厨曰每日以二頭作膳其夜夢十丈夫皂

布袴褶扣頭求哀明夜復夢八人求命方悟乃放之後夢八人來謝
晉桓邈為汝南郡人齋四烏鴨作禮大見夢四烏衣人請命及覺忽見鴨
將殺遂殺之買肉以代還夢四人來謝而去

宋元嘉三年春彭城劉樞字正一自江陵歸鄂下宿上明洲時夜月微明
吟宴次忽二人扣舟高呼正一云我自鄂下來要見正一樞引首望之見
二人各長五尺餘容貌華飾俱白服便出與語乃謂樞曰久欲奉謁今會
良時樞曰卿自鄂來有何相謂一人曰聞君儒士况復飲宴且欲奉陪幸
無間也樞覺其容止有異且疑非常更不敢啓遂與同宴夜闌此二人俱
醉於飲處便卧樞甚異之左右人皆相目不敢言以被覆之及明尚寢因
舉被見魚各長五六尺眼雖動而甚困矣樞不敢殺及昇致江中是夕夢
二人衣白衣各持一珠放樞卧前不語而去及曉枕邊得二珠各徑寸乃
二白魚之報也

宋景平中東陽大水永康蔡喜夫避住南壟夜有大鼠浮水而來伏喜夫
奴牀角奴慙而不犯每以飯與之水勢既退喜夫得返故居鼠以前脚捧

青囊內有珠三斤許留著奴牀前啾啾如欲語狀蓋以為謝也

梁中山劉滔天監三年為建康監與門生作食次竈裏得一龜長尺許在
灰中了不以燔炙為弊劉為設齋會放之於婁湖劉俄遷秣陵令

梁劉之身仕南郡嘗夢二人姓李詣之乞命之身不解其意既明有人遺
生鯉二頭之身曰必夢中所感者乃放之其夕夢二人謝恩云當令君延
一筭

晉崔放字子游清河人永嘉二十七年寓公安嘗因食鱠而病秋初臨湖
上山亭與女子同玩秋荷倚欄極眺忽聞亭檻之際有人語曰賢疾為嘗
食鱠不食則壽長放以左右無人遂起臨檻忽見檻下有一大龜又語如
前言訖入水放遂終身不食水族後放為江陵令年九十餘卒

陳宣帝時揚州嚴泰欲往襄州看親一馬一僕前詣襄陽時正深秋對景
自吟曰誰道江南景物佳岸邊常有四時花竹籬茅舍溪光淺元是西湖
膏酒家下馬沽酒獨酌忽一人至揖泰曰烏壽之使我來見遭難知君仁
慈必能提挈見在江左待君泰久思從來不識問來者公何人曰我乃元

深遂與深相送至江上悄然不見一人乃問元深烏壽之安在元深用手
指江上小舟曰壽之在此回首元深已不見小舟將近泰問烏壽之在此
漁人曰無遂歌曰遠望扁舟一葉來襄江兩岸百花開好拋生計承槎去
尤恐區區無取財泰曰此小舟何幹舟人曰此捕魚舟泰曰得魚何在漁
人曰今日不得魚只網得龜泰請看之漁人於絡袋中取出果見龜五十
餘箇於內有一大龜泰酬價買之令僕人引漁人入府陳負外所支錢五
十貫訖遂令漁人盡傾入江中泰次日到陳宅是夜閣中秉燭獨坐作詩
曰可嘆秋宵更漏長無人獨對篆煙香欲眠耳畔寒蛩碎端的心寘也斷
腸忽聞閣外有人作歌曰遠涉波瀾到此間報聞力布已先還待傾駑力
終身謝辛柰君恩重若山歌畢呼嚴公云壽之特來報謝泰開戶見元深
引一人來座前拜跪致謝不已泰曰公年高何必如此此人云某乃壽之
也因言前日所廢錢鈔令諸子拜送到又與公請延壽筭言畢二人辭而
去泰如夢寐至來日府中見漁者告泰云前日龜價錢盡沉江中泰笑曰
不義之財也遂辭親戚歸比到家百里父來遠接泰拜父父問曰數日前
人乎

四更以來有皂衣五十餘人各携錢一兩言汝見江上被人取了我父就
船中番舟而奪之令我等不遠千里送來留下錢而去其錢尚濕我與汝
毋以汝性命為憂泰方省曰信知壽之言前日所廢錢鈔令諸子送訖蓋
烏衣者乃小龜也元深龜也壽之大龜也夫水族受恩猶能報謝而況於
人乎

唐江西觀察使常丹年近四十舉五經未第嘗乘蹇驢至洛陽中橋見漁
者得一龜長數尺置於橋上呼呷餘喘須臾將死羣萃觀者皆欲買而烹
之丹獨愍然問其直幾何漁曰得二千則鬻之是時天正寒常既不可脫
衣為質乃以所乘蹇易之既獲遂放於河中徒行而去時有葫蘆先生不
知何所從來行止迂恠占事如神後數日常因問命葫蘆先生倒屣迎門
忻然謂丹曰翹望數日何來晚也丹曰此來求謁先生曰我友人元長史
談君美不容口誠託求識君子便可偕行丹思良久不能得因曰先生誤
矣但為決窮通先生曰我焉知君之福壽元公即吾師也往當自詳之遂
相與策杖至通利坊幽巷內見一小門葫蘆先生即扣之食頃有應門者

開門延入行數十步復入一板門又十餘步乃見大門制度宏麗擬於公侯之家復有丁隸數人皆極妍美先出迎客陳設鮮華異香滿室俄有一老人鬚眉皓然身長七尺褐裘常帶從二青衣出稱曰元濟之向常盡禮先拜常驚曰某貧賤小生不意丈人過垂採錄實所未喻老人曰老夫將死之命為君所生恩德如天豈容酬報仁者固不以此為心然受恩者思欲殺身報效耳韋乃矍然知其龜也然終不顯言之遂具珍羞留連竟日既暮常將辭歸老人即於懷中出一通文字授與常曰知君要問命故輒於天曹錄得一生官祿行止所在聊以為報凡有無皆君之命也所貴先知耳又謂葫蘆先生曰幸借吾五千文以充韋君致一乘早決西行是所願也常再拜而去明日葫蘆先生載五十緡至逆旅中韋賴以濟其文書具云明年五月及第又某年授咸陽尉又某年登朝作某官如是歷官一十七政皆有年月最後年遷江西觀察使至御史大夫到後三年廳前皂莢樹花開當有遷改址歸矣其後遂無所言常常寶持之自五經及第後至江西觀察使日月無所差異洪州使廳前有皂莢樹一株歲月頗久其

俗相傳此樹有花地主大憂元和八年韋在位矣一旦樹忽生花常遂去官至中路而卒初常遇元長史也頗性異之後每過東路即於舊居尋訪不獲問於葫蘆先生先生曰彼神龍也變化無常安可尋也常曰若然安有中橋之患先生曰屯難困厄凡人與聖人神龍與蠕蠕皆不免也又何異焉

唐大和中有處士姚坤不求榮達常以醫卜自適居于東洛萬安山南以琴樽自怡居之側有獵人常以網取狐兔為業坤性仁恒贖放之如此活者數百坤舊有莊質於嵩嶺善提寺坤持價贖之其知莊僧惠治行允常於閨處鑿井深數丈投以黃精數百斤求入試服觀其變化乃飲坤大醉投井中以礧石揜其井坤及醒無計躍出但飢茹黃精而已如此數日夜忽有人於井口呼坤姓名謂坤曰我狐也感君活我子孫不少故來教君我狐之通天者初穴於塚上因從竅中窺天漢星辰有所慕焉恨身不能奮飛遂凝盼注神忽然不覺飛出躡空駕雲登天漢見仙官而禮之君但能澄神泯慮注盼玄虛如此精確不三旬而自飛出雖竅之至微無所礙

矣坤曰汝何據耶狐曰君不聞西昇經云神能飛形亦能移山君其努力言訖而去坤信其說依而行之約一月忽能跳出於窟孔中遂見僧大駭視其井依然僧禮坤詰其事坤告曰但於中餌黃精一月身輕如神自能飛出窟所不礙僧然之遣弟子以索墜下約一月後來窺弟子如其言月餘來窺僧已斃於井中矣坤歸旬日有女子自稱天桃詣坤云是富家女誤出失蹤不可復返願持其帚坤見之妖麗冶容至于篇什筆札俱能精至坤亦念之後坤應制挈天桃至京至盤豆館天桃不樂取筆題竹筒為詩一首曰鈿華久御向人間欲捨鈿華更慘顏縱有青丘今夜月無因重照舊雲鬟吟諷久之坤亦矍然忽有曹牧遣人執良犬將獻于裴度入館犬見天桃怒目掣鎖連步上階天桃亦化為狐跳上犬首抉其目犬驚騰蹕出館望荆山而竄坤大駭逐之行數里犬已斃狐亦不知所之坤惆悵嘆息盡日不能前進及夜有老人挈美醞詣坤云是舊相識既飲坤終不能達相識之由老人飲罷長揖而去云報君亦足矣吾孫亦無恙遂不見坤方悟狐也後遂絕

唐李元於吳江岸見小赤蛇長不滿尺為牧童所困元以百錢售之放於茂草中明年再經長橋有進士諸浚謁見曰浚居橋尾數百步大人遣奉召幸恕坐邀遂同至一山樓殿寶飾侍衛甚嚴俄一人高冠道服引元坐曰小兒不幸幾死頑童之手賴君子活此微命願浚令再拜乃命置酒水陸交錯曰吾乃南海之鱗有功於世天帝詔居此封安流王吾有愛女小字雲姐今欲贈于子納之當得其助元乃別去後赴禮闈明日當試雲姐豫告以所試題目元頗留意暨入試果得大捷薦名登科雲姐告辭曰奉王命不敢久留作詩別曰六年於此報深恩水國魚邦省二親莫為初婚又相別都將舊愛與新人時元新娶故也

宋東平董瑛堅老之父知澤州陵川縣縣素荒寂市中唯有賣胡餅一家每以飲饌蕭索為苦會將嫁妹郡官寄餉鷄子三十枚食其七而留其餘掛於堂內梁上已而妹婿至庖妾請供晨餐董夜夢二十三小兒自梁而下同詞乞命中一女著裙帔而跛足旦起頰面妾持叉取所掛物得二十三枚方憶昨夢乃捨之遍求牝鷄於同官分抱馬皆一一成鷄唯一雌鷄

病脚董自是不殺生

偽蜀廣都縣百姓陳弘泰者家富於財嘗有人假貸錢一萬貫弘泰徵之甚急人曰請無慮吾先養蝦蟆萬餘頭貨之足以奉償弘泰聞之惻然已其債仍別與錢十千令悉放之江中經月餘弘泰因夜歸馬驚不進前有物光明視之乃金蝦蟆也

宋番城西南數里一聚落曰元生村居民百餘家皆以漁釣自給有屈師者買得他處魚塘至冬築小堰于外盡放塘水欲竭澤取魚見兩大黑鯉越出堰外復乘水跳入如是者至再三竊異焉迹其所為乃新育小鯉數百尾聚一窟中不能出故雌雄往來且銜且徙寧其身之陷死地而不恤也屈生既然大息乃決其堰悉出之棄役而歸後數年病死入冥陰官語之曰汝漁者以網罟為業而有好生之心其用意非他人比延汝壽一紀歸語世人勿殘天物也蓋死一夕而復生

宋洪慶善妻丁氏温州人雖居海濱而性不嗜殺後至江陰有患瓦隴百餘枚不忍食寘之盆中將以明日放諸江夜夢丐者甚衆裸體睚眦前後

各以一瓦自蔽皆有喜色別有十餘人愀然曰爾輩甚樂我何苦也丁氏寤而思之以瓦蔽形必瓦隴也夢中能記其數取視之已為一妾竊食十餘枚乃愀然者也得活者與夢中數同次夕復夢丐者拜謝庭下而去宋江丞相廷俊宣和中為將作少監時與鄭深道資之為同僚一日坐局汪得六鮮鯉將贈之鄭不知也方假寐夢六人立階下自贊云李秀才乞公一言于少監乞命鄭曰不知君等何罪俱曰公只一言之鄭許諾既寤連之汪公汪曰適得六鯉將設饋豈為是耶遂放之鄭至夕寐又夢六人來謝自此遂不食魚

宋富商楊序宣和間夢神告曰子逾旬當死若能救活億萬物命乃可獲免序曰大期已迫物命有限未易滿數神曰佛書有云魚卵不經鹽漬三年尚可再活曷不圖之序於是大書神語於通衢壁間由是人皆知戒見人殺魚即從取卵投之江中如是月餘復夢神曰億萬之數已滿壽可延矣既而果然

宋葉三解元有饋大鼈者投之水數日又進葉熟視之即前日所放之鼈

遂於腹下刺一佛字放在濟川橋下壬子歲父子同應鄉舉洪水驟漲舟至金水灘幾覆湏臾復正若有物扶其舟及至安流鼈現佛字始知即所放者是夜夢一皂衣嫗曰爾子璿今秋領鄉舉是年果然

宋程原常婺源人與妻嗜食團魚令婢梅香主魚飪每滋味不適口即撻之嘗得一大者長尺餘方操刀欲殺覩其伸縮顫悸為之不忍指而與言曰我尋常烹煮必遭杖責今放汝不殺亦不過痛打一頓遂解縛置於舍後汚池中池廣水亦未嘗竭程夫婦以鼈肥大且滿意飫餐之既失之怒甚杖婢數十絰二年婢患熱疾發狂奔躁昏憤家人知其不可療昇入池上茅亭以待命終明日天曉有扣宅後門扉者謂為鬼物叱去之乃言我是梅香病已無事乞令歸家啓閤信然問其故對曰半夜後歸歸見一黑物將濕泥草遍覆我身環繞三四十匝便覺心下開豁四肢清涼全無所苦始知獨在亭上程氏未以為然迨暮復使假作如昨日偃卧而密伺察之見巨鼈自池衝水藻浮萍徧覆其體程不省其故婢乃詳述放鼈之由云今比昔日其大倍加視尾後穿竅猶存於是竭池取之送諸深潭程遂

舉家戒不食嘗有名醫云執證之極卒未可解者汲新井水浸衣裳互熨之為妙不謂水族細類亦能如此蓋陰德所致也

宋井陘何縣尉天質仁慈每出見捕雀者必毀其具逐其人見活雀必買而放之常戒其人使易業如是者三年代期將近鄉民有被盜劫殺者上司督捕急迫不能獲忽有群雀數百飛迎馬首何深異之既而雀羣飛滿路傍百步外草舍上何遣卒搜屋下果有七人醉卧未醒及有賊仗在傍擒之乃真盜也遂解于官何尉美解竟受捕盜賞秩古有啣環之報信矣哉

宋王夢龍知婺州州治古木之上有鷹巢一卒探取其雛王方視事鷹忽飛下攫一卒之巾以去已而知非探巢之卒啣巾未還乃往攫探巢者之中守推問其故杖此卒而還其雛鷹乃引群鷹飛鳴旋繞於廳上若告謝之意而去

宋蜀郡舉人張洸雍熙丙戌歲往嘉州謁平羗令船次平羗泚下夜泊忽夢二人容貌端嚴白衣華煥於洸前俯伏求救洸覺唯聞船棹下跳躑之

聲不已視之乃二鯉魚洗遂取魚棄于江中既而就寢復夢二人衣白衣持大蒜數頭懇謝而去進明方悟向夢者魚也至平羗因以夢告平羗令今日君之夢祥符也放魚所感蒜者筭也當延君筭耳洗至晚年著後隱書三卷亦記夢魚之事身壽七十八而卒

宋息州李景文惡殺好生凡有賣魚蝦螺蚌之屬盡買而放之池景文帝服丹砂喉吻生煙眼鼻出火皮膚如裂煩躁欲死投浸池中螺蚌遍體如吮喻然須臾平復池水為熱螺蚌十數斛紛紜登陸昇於江人謂其好生之報也

宋景定癸亥荆門軍黃妣于慶京學病亟報其子至未至十數里宿田舍繼有扣門投宿者與黃各通姓名談論古今疊疊可聽因問黃來故曰尊君得非黃妣子耶黃曰然何故相識其人曰予死尊君實生之近聞其病乃因多食魚生胸中積冷誤食涼藥今但服薑附湯可愈今幸相遇予可母行言訖不見黃到京乃知其父因上賜熟多服涼藥與冷積相併遂服薑附取效焉妣子未嘗活人但同齋曾獲一龜將脫其殼黃憐而縱之蓋

其報也

唐劉彥回其父為湖州刺史僚屬送銀坑回有以一大龜為獻者曰得此龜者壽當千歲其父即日復回送于坑所父歿彥回為房州司士忽山水暴至平地數尺一家惶恐未有所之俄有大龜似欲引路從龜而行歷十餘地皆得淺處遂脫水難是夕復夢大龜曰昔在銀坑嘗蒙先使君救脫之惠今故奉報昔應世真人曰一切翔飛蠢動皆不可殺龜蛇二物尤不可殺若輒殺之或至殺有靈者其陰精定能害人是以識者常加救護必獲其報

宋宋郊宋祁方州角同肄業大學有胡僧相之曰小宋他日當魁天下大宋亦不失甲科後十餘年春試罷復遇僧於廛邸僧執大宋手驚曰公風神頗異似曾活數百萬命者大宋笑曰貧儒何力及是僧曰不然肖翹之物皆命也公試思之大宋俛思良久乃笑而言曰旬日前所居堂下有蟻穴為暴雨所侵羣蟻繚繞穴傍吾乃戲編竹為橋以渡之由是獲全得非此乎僧曰是也小宋今歲固當首捷然公終不出其下二宋私相語曰妄

也一歲固無兩魁比唱第小宋果中首選章獻太后當朝謂不可以弟先
死乃以大宋為第一小宋為第十始信僧言不妄

宋京師有一酒匠每日見酒及水內浸死蠅輒取出用乾灰救之生則放
焉如此數年所活者甚多一日偶被罪當死官欲行刑府官執筆書判有
一蠅抱筆頭不得書遂去之再點筆復如是初以為偶然至三四次官疑
有冤抑乃再閱審問未決間忽遇大赦得免罪而還夫蠅至微之虫何識
而致是不過造物者用之以報酒匠之善心爾

宋贈參養母至孝曾有鶴為人所射窮而歸參參收養療治瘡愈放之後
鶴夜到參門秉燭視之鶴雌雄雙至各銜明珠來謝驚數萬緡參家遂殷
富

晉李冲元好食鱸嘗夢一媪衣皂衣告曰我腹中有五千子我死子亦死
矣儻能生之獲福無量冲元意其鱸也遂捨之誓不再殺後夢此媪來謝
家由此益裕

宋張提刑妣獻嘗與妻戮力就屠家買物命放生日有定數十餘年後其
妻死張於密室俯疏以平日所放物命追福手自焚之人無知者至大祥
作黃籙齋道士拜章罷言宜人別無過又得所放物命功德疏功德最大
已超生天界矣始大驚悟遂勵志不衰

宋蔡君謨未仕時每喜食鷄一夕夢褐衣老人曰來日當被害願公貸命
蔡問汝何人乃誦詩云食君數粒粟充君羹中肉一羹斷數命下筋猶未
足口腹須臾間禍福相倚伏願君戒勿殺死生如轉轂覺而異之詢於厨
中有黃鶡數十放之絰夕復夢褐衣老人曰感公從禱已獲復生今上帝
已命注公高爵後蔡果顯貴于時

隋侯見大蛇被傷而治之後蛇銜珠以報其珠徑寸純白夜有光明如月
之照一名隋侯珠一名明月珠

晉李奕子東平太守李忠祖母本一山媪每遇大雪鳥無安枝往往飛集
其家遂留不去媪濟以穀且不敢驚上帝謂有仁心賜令度亡後得道居
華陽洞宮

後魏裴安祖間居養志不出城邑曾於天熱時舍大樹下有鷲鳥逐雉雉

急投之遂觸封而死安祖愍焉乃取置陰地徐徐護視良久得蘇安祖喜而放之後夜忽夢一丈夫衣冠甚偉者繡曲領向安祖再拜安祖恠問之此人云感君前日見放故來謝德聞者異焉

昔有大樹僊者居沅伽河也但側棲神人定積年之久形如槁木遊禽棲集遺足拘律名果於其肩上暑往寒來乘蔭合拱一夕忽從定起欲去其樹又恐鳥驚於是安忍方便移之移訖乃起天美其德賜號大封僊陳嚴恭者黃州人家富於財而無兄弟父母愛之太達初恭年弱冠請於父母願得五萬錢往鄂州市易父母從之恭載物而下去鄂州四十里江中逢一船載龜將詣市賣之恭念龜當死因請贖之謂龜主曰我正有三萬錢願以贖之龜主喜曰請以相售恭遂盡質放之江中唯空船詣鄂州其龜主別恭行十餘里船沒而死是日恭父母在家日昏時有烏衣客五十人詣門寄宿并送錢三萬付恭父母曰公兒在鄂州附此錢歸願依數受也父恠愕以為恭死因審之客曰兒無恙但不須錢故附歸耳恭父受之記是本錢而皆小濕因留客為設食明日客辭去後月餘恭還家父

毋大喜而問附錢之由恭答無之父母說客形狀及其月日乃贖龜之日於是知客乃龜也父子驚歎

隋智者法師以身衣勸人贖鱉

鱉取一所為放生之池時臨海內史計

翊請講光明經漁者聞法皆好生去殺舍江溪麓梁三十六所三百餘里俱成法池翊後還都坐事被繫臨當伏法送翼智者垂救夜夢羣魚巨億吐沫相濡明旦有詔特原翊罪

唐魏郡馬嘉運性不嗜殺在蜀之日見人將竭池取魚嘉運時為人講書得絹數十疋因盡買魚放之貞觀六年正月居家日晚出大門忽見兩人各控馬一疋先在門外對下立嘉運問是何人答云東海公使迎馬生耳嘉運素有學識知名州里每臺使及四方貴客多請見之及見此不恠也謂使者曰吾無馬使者進馬嘉運即於對下上馬去其屍倒卧於地俄至一官曹將入大門有男女數十人在門外如訟者有一婦人先與嘉運相識是同郡張公瑾妻姓元氏手執一紙文書迎謂嘉運曰馬生尚相識否昔張總管家某曾相見總管無狀非禮殺我我訴於天曹已三年為王天

主救護公瑾故常見抑今乃得伸官已退之不久將至矣嘉運先知元氏被殺及見方自知死使者引入門門者曰公眠未可謁宜且就霍司刑處坐嘉運見之乃益州行臺郎中霍章也延嘉運坐曰此府記室官缺東海公聞君才學欲屈為此官耳嘉運曰貧守妻子不願為官得免幸甚章曰若不能作自陳無學有相識可舉令作俄有人來云公已起引嘉運入見廳事有一人坐肥短黑色呼嘉運謂曰聞君才學欲屈為記室耳能為之手嘉運拜謝曰幸甚但鄙夫田野以經業教授後生不足以當此任公曰識霍章否章曰識之因使台章問嘉運才術章曰平生知其經學不見作文章公曰誰可嘉運曰有陳子良者解文章公曰放馬生歸即命追子良嘉運辭去章與之別云倩君語我家狗吾臨終語汝賣我所乘馬作浮圖汝那賣馬自費速如我教造浮圖所云我家狗者謂其長子嘉運因問向見張公瑾妾所言天主者為誰章曰公瑾鄉人王五我死為天主常救公瑾故得至今今已不免矣言畢而別遣使者送嘉運至一小澁道命由此路歸下澁道如跌而寤嘉運具言之其年七月綿州人姓陳名子良暴死

經宿而蘇自言見東海公欲用為記室辭不識文字別有吳人陳子良卒公瑾亦亡自二人亡後嘉運嘗與人同行於路忽若見官府狀驚怖趨走頃之乃定同侶問之荅曰向見東海公使人云欲往益州追人仍說陳子良許君霍司刑為君被誚讓君幾不免賴君贖生之福故得免後太宗使岑文本問其事文本錄以奏嘉運終於國子博士云
唐荆南俞一郎專好放生及塑佛像後因病見二鬼追之前路多有飛禽走獸迎接又遇千餘僧引至一所殿上有王者坐二判官持文簿侍側王者命檢簿有何善業判官云此人有贖放物命之功所放者已受人身三千餘合增壽二紀命青衣童子送回復活右手掌上有朱字數行隱隱不能辯蓋批判語也

唐僧善信大師學於馬祖悟佛法大意後往五臺廟無碍供父之見老父謂曰師之大緣當在隨洪師依教至大洪山適居人以牲物禱雨于山之龍池師止之曰勿殺是牲吾當為汝禱乃登山宴坐甘雨霈然後忽以利刀斷左右足置几上白乳流涌脫然坐化

唐天寶中當塗漁人劉成李暉載魚往丹陽浦中李他往忽見船上大魚振鬣搖首稱阿彌陀佛劉驚奔于岸俄聞萬魚俱跳躍有念佛聲劉大恐於是盡投魚于江李至不信劉即用已財償之明日於荻中得錢萬五千題云還汝魚直

宋錢塘壽禪師者本北郭稅務專知官每見鬻魚蝦輒買放之以是破家一日坐累當死吳越王遊于江上夢老人引魚蝦數萬至云此皆稅務官所放者願王免其辜王寤憐而釋之乃捨身出家得法眼淨禪師應以市曹得度故菩薩乃現市曹以度之學出死入生法得向死地走一遭抵三

千年情行

宋吳子英者舒鄉人善入水捕得一赤鯉魚愛其色好持歸不殺養之池中數飼以米穀飼之一年長丈餘遂生角有翅于英怖拜謝之魚言我迎汝可上我背與汝俱升天歲餘來歸見其妻子魚復迎之於是舉家皆升天云

元鄞城官講所有二僧同居一僧苦於鼠以大小二桶裝照鏡撲鼠機發鼠受撲僧急去携水欲滄殺之同居僧不忍潛揭桶縱之去明日撲鼠僧他出是夕僧獨宿聞羣鼠喧聒異常僧厭之云找他夕縱汝汝反聒我及早起於榻前得青條一事心甚疑焉數日後僧以條束腰鄰僧見之指云此是吾物嘗失之卧内公奚得僧陳所以始知是夕鼠集黨竊隣僧條以報德故喧聒耳

唐眉州通義縣楊寵有女名正見幼而聰悟既笄父母聘與同郡王生一旦舅姑使為繪正見憐魚生在盆中不忍殺請于舅姑而放之一日正見迷入山中有女冠在焉知其有好生之心留止山舍常使汲澗泉已數年矣每於水次見一兒潔白可喜才及歲餘一旦抱歸兒已殭矣視之乃茯苓也因潔以蒸之女冠出山正見聞其香因就甑取食之自是容貌光彩射人開元二十一年十一月三日昇天

宋諸暨縣令潘華依普賢懺法不令人捕江湖內魚是年奉詔還闕夜夢江湖中魚為人形者數萬踴哭沸天皆云長者去矣吾衆不免烹矣華異之作夢魚記以囑後來宰邑者

宋荆南府左班殿直孫良嗣一生虔奉真武常獲神貺因見俗屋多殺物命每自思惟皆是輪迴何忍為之常於市肆買飛禽魚鼈之類放之經十五年良嗣自然達性悟理凡有作為多有奇感人皆號曰孫先生忽一日無病而卒卜葬荆積山南開墳有衆鳥啣泥裝壘土塋地穴出水化生魚鼈地生芝蓋下柳時有五色祥雲草蔭四向墳前有一小竅現出龜蛇盤旋喜躍其靈應如此

昔陵陽子明者鉉鄉人也嘗釣魚于漢水釣得白龍子明懼解釣拜而放之後得白魚腹中有書教子明服食之法子明遂上黃山採五石春石肺水而服之三年白龍來迎遂仙去

昔同州司馬裴沉嘗侍再送林自洛往鄭州在路日晚下馬覺道左有人呻吟聲因披蒿萊下見一病鶴翅閉上瘡壞無毛忽有白衣老人曳杖而至謂裴曰少年憫此病鶴耶若得人血一塗即能飛裴曰請刺此臂血老人笑曰須三世人其血方中郎君前生非人唯洛中葫蘆生可裴欣然而返至洛訪葫蘆生陳其事生取一石合大若兩指授針刺臂滴滴乳下滿

合授裴曰無多言也及至鶴處老人已至喜曰信士乃以血塗鶴復邀裴至所居裴覺非常人以丈人呼之至一莊與裴養生之要裴渴甚求茗老人指一玉龕曰此中有少漿裴視龕中有杏核一如如筮中有漿白色飲之不饑渴漿味如杏酪裴請為奴老人曰君有微祿縱住亦不能終其志賢妣真有所得吾久與之遊今有一信憑君傳達因表一幘物大如筮戒無竊開裴還中路將開之幘四角各有赤蛇出頭裴乃止妣得信開之有物如乾大麥飯升餘其妣後因遊玉屋不知所終裴壽九十七而卒

宋吉州隆慶長老了達言嘗寓袁州仰山寺與同參數人約往他郡行脚取笠欲治裝見笠內有鼠窠實以碎絹紙新生鼠未開眼者五枚啾啾然達欲去之恐其死乃謝同行者託以他故不往又數日五鼠能行達以粥食飼之每夕宿笠中旬餘始不見其中潔然無滓穢得淨笠衣及茶一角達意其竊以來懸之僧堂三日無取者於是白主者告於衆以其茶為供而行自是所至不蓄貓鼠亦不害

宋平陽邑淨明院有園梨有元者愛惜物命嘗作勸放生文鏤于板邑人

為之減殺一夕元忽夢與百餘人俱立庭下皆云當就極刑元甚恐念平生無惡何乃至是覺猶不樂因出戶外見有挈筠籃鬻小蟹者因買放之其數果百餘元乃悟後竟生化

大明仁孝皇后勸善書卷之十四